



**REPUBLIKA E SHQIPËRISË**  
**KOMISIONERI PËR MBIKËQYRJEN E SHËRBIMIT CIVIL**  
**DREJTORIA E PËRGJITHSHME E INSPEKTIMIT DHE MBIKËQYRJES**

Nr. 875/1 prot.

Tiranë, më 18.11.2024

**VENDIM**  
**Nr. 73, datë 18.11.2024**

**PËR**  
**PËRFUNDIMIN E PROCESIT TË VERIFIKIMIT TË EKZEKUTIMIT TË**  
**VENDIMIT TË KOMISIONERIT NR. 19, DATË 28.02.2023**

Në mbështetje të kompetencave ligjore të parashikuara në nenet 11, pika 1 dhe 14 të ligjit nr. 152/2013, “Për nëpunësin civil”, i ndryshuar, dhe Rregulloren, “Mbi procedurat e mbikëqyrjes/inspektimit”, miratuar me vendimin nr. 17, datë 11.03.2015, ndryshuar me vendimin nr. 158, datë 30.12.2022, të Komisionerit për Mbikëqyrjen e Shërbimit Civil, pas shqyrtimit të relacionit dhe mendimit paraprak të Drejtorit të Përgjithshëm të Inspektimit dhe Mbikëqyrjes dhe Drejtorit të Drejtorisë së Zbatimit të Vendimeve Paralajmëruese, në lidhje me verifikimin e zbatimit të Vendimit nr. 19, datë 28.02.2023, të Komisionerit, “Për miratimin e raportit përfundimtar të mbikëqyrjes së administrimit të shërbimit civil në Ministrinë e Brendshme dhe paralajmërimin e institucionit për të rregulluar gjendjen e ligjshmërisë”.

**KONSTATOVA SE:**

Me vendimin nr. 107, datë 15.07.2022 “Për kryerjen e mbikëqyrjes në lidhje me zbatimin e ligjshmërisë gjatë procesit të vlerësimit të rezultateve në punë të nëpunësve civilë në aparatin e Ministrisë së Brendshme”, Komisioneri për Mbikëqyrjen e Shërbimit Civil ka vendosur fillimin e procesit të mbikëqyrjes në lidhje me zbatimin e ligjshmërisë gjatë kryerjes së procedurës së vlerësimit të rezultateve në punë të nëpunësve civilë në aparatin e Ministrisë së Brendshme.

Ky proces është përmbyllur me Vendimin nr. 19, datë 28.02.2023, të Komisionerit, “Për kryerjen e mbikëqyrjes në lidhje me zbatimin e ligjshmërisë gjatë procesit të vlerësimit të rezultateve në punë të nëpunësve civilë në aparatin e Ministrisë së Brendshme”, ku janë lënë detyra konkrete për rregullimin e ligjshmërisë.

Me kalimin afatit të lënë në vendimin e mësipërm, përmes shkresës nr. 2410/3 prot., datë 01.08.2023, “Mbi zbatimin e vendimit nr. 19, datë 28.02.2023”, institucioni i Ministrisë së Brendshme ka njoftuar Komisionerin për masat e marra.

Në kushtet kur, përgjigjja e institucionit nuk ishte e zauruese, Komisioneri, në datën 16 shtator 2024, i është drejtuar me anë të komunikimit elektronik Departamentit të Administratës Publike, duke kërkuar një informacion për të gjitha ministritë që i janë nënshtruar procesit të mbikëqyrjes me objekt vlerësimet e punës të nëpunësve civilë. Ky i fundit, me e-mailin e datës 14 shtator 2024, i është përgjigjur kërkesës së Komisionerit, duke parashtruar situatën e ecurisë së procesit në këto institucione.

Mbështetur në detyrat e lëna në Vendimin nr. 19, datë 28.02.2023, si dhe bazuar në përgjigjen e institucionit dhe njësisë përgjegjëse (DAP), lidhur me veprimet administrative të kryera prej tyre, situata e administrimit të shërbimit civil në institucionin e Ministrisë së Brendshme paraqitet si më poshtë vijon:

Në pikat 2 dhe 3 të dispozitivit të vendimit, Komisioneri ka kërkuar nga Departamenti i Administratës Publike, në cilësinë e njësisë përgjegjëse, të drejtojë procesin e vlerësimit për TND-në, në mënyrë që formularët e vlerësimit të plotësuar dhe të nënshkruar nga Komisioni Kombëtar i Përzgjedhjes, t’i përcillen zyrtarisht nëpunësve civilë anëtarë të TND-së, të cilët aktualisht janë të emëruar në aparatën e Ministrisë së Brendshme, me qëllim që nëpunësit të nënshkruajnë duke deklaruar marrjen dijeni, si dhe dakordësinë apo mosdakordësinë e tyre lidhur me vlerësimin e kryer.

Me anë të komunikimit elektronik të datës 14.10.2024, DAP ka informuar Komisionerin se përsa i takon vlerësimeve për TND-në, ato janë në fazë shqyrtimi dhe diskutimi së bashku me ministritë e linjës për finalizimin e këtij procesi.

Në pikat 4 – 11 të vendimit objekt i këtij verifikimi, Komisioneri ka kërkuar nga subjektet e ngarkuara nga ligji me detyra të posaçme në administrimin e shërbimit civil gjatë procesit të vlerësimit të rezultateve në punë të nëpunësve civilë (*zyrtarët raportues, kundërfirmues dhe autorizues*) të marrin masat si më poshtë:

- Në rastin kur shihet e nevojshme shtyrja e afatit të periudhës së provës për nëpunësit e nivelit ekzekutiv, eprori direkt duhet të nxjerrë një vendim të arsyetuar për shtyrjen e afatit të konfirmimit.
- Në rastin e vlerësimeve të pjesshme për shkak të largimit të zyrtarëve që duhet të bëjnë vlerësimin, zyrtari raportues zëvendësues që përmbyll procesin, të bëjë vlerësimin përfundimtar për gjithë periudhën 6-mujore të vlerësimit;
- Të individualizohet secili vlerësim pune, sipas punës së kryer dhe cilësive personale të nëpunësve.
- Të plotësohen hapësirat përkatëse të dedikuara për komente dhe shpjegime;
- Hartimin e një plani trajnimi me karakter të posaçëm për kryerjen e detyrave të veçanta që ju vendos zyrtarëve të vlerësimit legjislativoni i shërbimit civil.

Referuar përmbajtjes së shkresës së sipërcituar të Ministrisë së Brendshme, nga ana e këtij institucioni relatohet se janë marrë masat administrative që lidhen me procesin e vlerësimit periodik të nëpunësve civilë, të cilat janë reflektuar në vlerësimet janar-qershor të vitit 2023, duke përcjellë formularë vlerësimi të punës për nëpunësit të nivelit ekzekutiv, të ulët dhe të mesëm drejtues.

Sa më sipër konfirmohet edhe nga njësia përgjegjëse (DAP) në e-mailin e datës 14.10.2024, dërguar Komisionerit, ku theksohet se detyrat e lëna për vlerësimet e nëpunësve civilë deri në nivelin e mesëm drejtues janë zbatuar referuar përcaktimeve të akteve nënligjore në fuqi.

Në lidhje me rekomandimin për hartimin e një plani trajnimi me karakter të posaçëm për kryerjen e detyrave që ju vendos zyrtarëve të vlerësimit legjislativ i shërbimit civil, Sekretari i Përgjithshëm i MB-së, me anë të shkresës nr. 3421 prot., datë 28.03.2023, i ka komunikuar Shkollës Shqiptare të Administratës Publike (ASPA) nevojën për trajnime të zyrtarëve raportues dhe kundërfirmues mbi procedurën e vlerësimit të rezultave në punë.

Njëkohësisht, rezulton se, Drejtoria e Menaxhimit të Burimeve Njerëzore pranë MB-së, me anë të shkresës “*Kërkesë për planifikim trajnimi*”, me nr. 2410/2 prot., datë 01.08.2023, i është drejtuar Departamentit të Administratës Publike, duke i kërkuar këtij të fundit trajnime të posaçme profesionale për nëpunësit pranë këtij institucioni.

Për sa u përket më sipër, vlerësoj se, nga ana e institucionit janë zbatuar detyrat e lëna në pikat 4-11 të dispozitivit të vendimit.

Ndërsa sa i takon vlerësimeve për Trupën e Nivelit të Lartë Drejtues, nisur nga kompleksiteti i veprimeve që duhet të kryhen në këtë rast, si dhe nga organizmi specifik që duhet t’i kryejë këto veprime, bazuar edhe në pikën 4, të nenit 36, të Rregullores “*Mbi procedurat e mbikëqyrjes/inspektimit*”, miratuar me vendimin nr. 17, datë 11.03.2015, të Komisionerit, (e ndryshuar), vlerësoj se pikat 2 dhe 3 të vendimit duhet të jenë objekt i kontrollit gjatë mbikëqyrjes së radhës në subjekt ose mbikëqyrjes së orientuar që ushtrohet në vijimësi gjatë gjithë vitit, ku informacioni mbi ecurinë e procesit dhe realizimin e detyrës nga ana së Ministrisë së Brendshme t’i përcillet inspektorit që e mbikëqyr këtë subjekt.

### **PËR KËTO ARSYE:**

Bazuar në nenet 11, pika 1 dhe 14 të ligjit nr. 152/2013, “*Për nëpunësin civil*”, i ndryshuar; ligjin nr. 44/2015 “*Kodi i Procedurave Administrative i Republikës së Shqipërisë*” dhe Rregulloren, “*Mbi procedurat e mbikëqyrjes/inspektimit*”, i ndryshuar, miratuar me vendimin nr. 17, datë 11.03.2015, ndryshuar me vendimin nr. 158, datë 30.12.2022, të Komisionerit për Mbikëqyrjen e Shërbimit Civil.

## **VENDOSA:**

1. Përfundimin e procesit të verifikimit të zbatimit të Vendimit nr. 19, datë 28.02.2023, të Komisionerit, *“Për kryerjen e mbikëqyrjes në lidhje me zbatimin e ligjshmërisë gjatë procesit të vlerësimit të rezultateve në punë të nëpunësve civilë në aparatit e Ministrisë së Brendshme”*, për pikat 4 – 11 të dispozitivit të këtij vendimi, për shkak të rregullimit të ligjshmërisë nga ana e institucionit.
2. Konstatimin e rregullimit të ligjshmërisë nga ana e institucionit Ministria e Brendshme, duke zbatuar detyrat e lëna në pikat 4 – 11 të dispozitivit të Vendimit nr. 19, datë 28.02.2023.
3. Njësia përgjegjëse, Departamenti i Administratës Publike, në përfundim të procesit të vlerësimeve për Trupën e Nivelit të Lartë Drejtues, të njoftojë Komisionerin në lidhje me realizimin e detyrave të lëna në pikat 2 dhe 3, të vendimit 19/2023, të Komisionerit. Realizimi i kësaj detyre do të ndiqet nga Komisioneri në mbikëqyrjen e radhës në këtë institucion.
4. Për këtë vendim të njoftohet njësia përgjegjëse, Departamenti i Administratës Publike.
5. Ky vendim hyn në fuqi menjëherë.

## **KOMISIONERI**

**Pranvera Strakosha**